

## Pablo Corinto Anoafo Afianã Kirika Kenexõ Fomani

### *Pablo Corinto anoafo yoisharani*

<sup>1</sup> Ëfe yora mĩshtichi, êkĩa Pablo. Ë kirika kenexõ mato fomai mã tâpinõ. Nofeta Jesús Ifofamis Timoteo feta ã mato kirika kenexõ fomai. Epa Niospa ea katopaiyaito Cristo Jesús ea katonĩ ãfe meka ã mato yoifofãfõfãinõ.

Nios chanĩmara faafo Corinto anoafo, Acaya mai anoafori ã mato keyokõĩ yoisharai. <sup>2</sup> Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ãto õiti inimamasharaxõfe. Askatari ato shara fafe,” ixõ ã matoõnoa yoimĩs.

### *Pablo omiskõĩni*

<sup>3-4</sup> Nõ Epa Nios yoisharanõ iskafakĩ: “Epa Niospa, mã noko sharafa fafãfãini. Mã sharafĩnakõia. ¡Aichol!” ixõ nõ Epa Nios yoinõ. Nãfi nõko Ifo Jesucristo ãfe Apaki. Nãatorĩ noko noisharakõĩ. Askatari nõ omiskõiaito noko inimamatiro. Akka nã nõ meemis keskara mei, fetsa omiskõiaito nõ inimamatiro, nã Epa Niospa nõ omiskõiaito noko inimamamis keskafakĩ. <sup>5</sup> Cristo omiskõimakĩfinakõinifo. Nãskakẽri nõri Cristoõnoax omiskõikõĩ. Akka Cristo omiskõiaito Niospa axosharakõini. Nãskakẽ Cristoõxori nokori Niospa axosharakõĩ. <sup>6</sup> Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro. Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã

mã noko õimis nõ omiskõiaito Epa Niospa noko axosharaito. Nãskarifiã mãri omiskõiaito Epa Niospa matori axosharakõixii mã tenesharakõinõ. <sup>7</sup> Mã nõ tãpia nõ omiskõiai keskai mãri nofe omiskõiaito Epa Niospa nõko õiti inimama keskafakĩ matori inimamasharai.

<sup>8-9</sup> Efe yora mĩshtichi, Asia mai anoax nõ omiskõita ã mato yoi mã tãpinõ. Nõ omiskõifinakõita tenetiroma mei nai keskarakõi nõ meita. Nãskakẽ nõ tãpitiro nãskara Epa Niospa noko tãpimana nõã nõ ifimetiroma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nãatofi yorafo otofatirokĩ, ixõ nõko shinã mẽraxõ nõ shinãita. <sup>10-11</sup> Akka nõ fãsi omiskõi nakerafiaino Epa Niospa noko ifita. Anã afetiãra noko ifixii. Askatari nõ chanĩmara fakõini nokomãi ifitaifamiskẽ, mãmãi noko Epa Nios kĩfixomiskẽ. Mã noko askafaino nã Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõi,” ixõ yora ichapafãfe yoixikani.

### *Afeskai Pablo kanimamẽ Corinto ano*

<sup>12</sup> Nã nõ fakira kafãsai ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharaifinakõimis. Nãskakẽ nõ shinãchakaima nõ inimasharakõi. Akka nõkai nõ mato pãramisma, chanĩma fisti nõ mato yoimis. Niospa noko noikĩ noko shinãmanaino nõ isharanõ mato mẽranoax. Askatari nã nõ fakira kafãsai ariax nõ isharakõimis. <sup>13-14</sup> Ë mato kirika kenexõ manamani tãpitiropinĩ shara faxõ fekaxma mã tãpitiro xafakĩã sharakõi. Nãskafekẽ atirifãfe

tāpisharafoma ẽ afe keskaramāki. Nāskafixō mā tāpisharai, nāskara shara ẽ fichipai. Nāskakē nōko Ifo Jesús anā oaino mā nokoki inimasharaxii, nōri matoki inimasharanō.

15-16 Nāskakē ẽ shinā ẽ Macedonia ano kaitīa ẽ mato ano māpefaixii anā ẽ mato yoisharaxiki mātō ōiti mēra mā inimanō. Askata nā Macedonia anoax ẽ oaitīa anā ẽ mato ano māpetiro mato fe iyoxiki. Chipo Judea ano ea nīchitirofo, ixō ẽ shināni. 17 Nānori ẽ shināfiāx ẽ mato ari ẽ kayoikaima. Akka mā iskafakī shināiraka: “Pablo ẽ kaira ifiāx kaima, ¿afeskakī noko pāramē?” ixō mā shināiraka. Akka ēkai ōiti ranāyama fetsa yoikī, fetsa yoikī ẽ fapanā. Nā yōra Jesús Ifofaamato shināi keskara ẽ shināima. 18 Nā Niospa noko pāramisma keskafakī nōrikai mato pāramisma. Nāskakē tāpisharakōia nō mato pāramisma. 19 Akka Timoteo ikaino Silvano ikaino ẽ ikaino Jesucristo Niospa Fakeōnoa nō mato yoimis. Jesucristo mekakai rafema, āfe meka mēstekōi. Chanīma fisti. 20 Epa Niospa noko yoiyoa keskara keyokōi Cristo mā noko axomis. Nāskakē nō keyokōichi yoimis iskafakī: “Epa Niosi, mī fāsi sharakōi. Jesúsxō keyokōi mī afama mīshti famis nā mī yoiyoa keskafakī. Nāskakē Jesús aneōxō nō mia aicho fai,” ixō nō yoimis. 21 Askatari Epa Niospa mato yafi noko Jesús Ifosharakōifama. Nāskatari noko katoxō noko nīchini āfe meka yoimis nō inō. 22 Akka fētsa āfe afarafo marakka fatiro fetsafāfe tāpinōfo āfenākē. Nāskafakīri Epa Niospa āfe Yōshi Shara nō mēra nanea aōxō nō tāpinō nō afe yoraxō. Nāskakē nō tāpitiro afara fetsa nā noko yoiyoa keskara chanīmakōi noko ināxii.

<sup>23</sup> Ë mato ari kaira ixõ ã shinãfiitaxakĩ ã kaama. Epa Niospa ea tãpikõia ã chanĩkẽma. Ë mato ari kakerana. Nãskafiax ã kaama ã mato shinãkĩ. Ë ato ari kaxõ ã ato fasi yoikĩ ã ato shinãmitsamatiro ikax nãskax ã mato ari kaama. <sup>24</sup> Ë mato askafatama ãroko mato inimamapaisharai. Ëkai mãto ifo ipaima. Akka Jesús fisti nõko Ifo. Akka mã mã Jesús chanĩmara faxõ mã mã Jesús Ifo sharakõifai. Nãskakẽ ã mato feta Jesús yonoxopai mã inimai finakõinõ, askatari mã Jesús Ifo sharakõifanõ.

## 2

<sup>1-2</sup> Nãskakẽ ãfe shinã mẽraxõ shinãkĩ ã iskafayamea: “Ë Corinto ari kapaifi ã kaima. Akka ã kaxõ ã ato yoikĩ iskafapaima: ‘A mã afara chakafamis keskara xatekãfe,’ ixõ ã ato yoikĩ ã ato inimamatiroma. Askakimaroko ã ato shinãmitsamatiro. Ë ato shinãmitsamanaino, ¿tsõa ea inimamatiromẽ? Akka ares fisti ea inimamatirofo,” ixõ ã shinãyamea. <sup>3</sup> Nãskakẽ ã mato kirika kenexona, mato ari kakĩma. Akka ã shinã, “Ë ato ari kaxõ ã ato iskafaino: ‘Mã isharakõiyama mãto chaka xatekãfe,’ ã ato faino shinãmitsakõitirofo,” ixõ ã shinãyamea. Akka mã ea nikayamaino ãri shinãmitsakõitiro. Akka mã anã Nios nikakĩ anã isharakõiaino, mã ea inimamasharakõitiro. Akka mẽ tãpikõia ã inimakõiaino mãri inimakõitiro. <sup>4</sup> Ë mato kenexokĩ ã meyamea ãfe õiti shinãmitsakõiaito oiayanã. Ëkai mato shinãmitsamapainima. Askatamaroko ã mato kenexoni a ã mato noikõiai keskara mã tãpinõ.

*Fẽtsa noko chakafaito nõ rae fatiro*

5 Akka nã feronãfake fëtsa ea chakafakĩ mekafakĩ ea fisti shinãchakamanama, nã mã Nios Ifofaafari keyokõi mato shinãchakamana. Nãskakẽ noko keyokõi chakafakĩ mekafaa. Noko askafafiaino êkai na feronãfake omiskõimaki finapaima. 6 Akka mã ranãrito omiskõimanakĩ nãskanõkãfe. 7 Akka a mã aka keskafakĩ anã askafakĩma rae fakãfe. Nãskaxõ yoisharakãfe inimamasharakakĩ anã omiskõinõma. Akka mã askafayamaino âfe shinã mëra shinãmitsakõitiro anã shinãsharatiroma anã Nios Ifofapaima. 8 Nãskakẽ ã mato yoiã keskafakĩ ea nikasharakãfe. “Nõ mia noikõi. Mĩ anã nofe isharakõitiro,” ixõ yoikãfe tãpinõ. 9 Ë mato kirika kenexõ manamayamea tãpipaikĩ mã mëxotaima ea nikakõimãkai. 10 Mã fetsa raefakẽ ãri nã raefatiro. Fëtsa ea chakafaito ã mato shinãkĩ Cristo ea õiaino ãri nã raefatiro. 11 Nõ fetsa raefasharakõiaino Satanás noko feparatiroma. Nõ tãpisharakõia Satanás noko kexepaikõi. Akka a Nios Ifofaafoma tiito chakafakĩ mekafatirofo Satanás fichipaiyai keskara. Akka nõ fetsa raefaino Satanás noko afeskafatiroma.

*Pablo peXe rasi Troas ano nokoax inimanima*

12 Akka ã mato eõnoa tãpimapai. Ë peXe rasi Troas ano kani meka shara Cristoõnoa ato yoikai. Cristoõnoa nikapaikõinifo. Nãskano nõko Ifãfe ea atoki nĩchini ã ãfe meka ato yoinõ. 13 Akka ã shinãni nofe yora Tito Troas anoa ã fichikaira ixõ. Akka fichiyamax ã inimanima. Nãskaxõ ã fãsi shinãkõini. Nãskata, “Mẽ kai,” ixõ Troas anoafo nã nõko Ifo chanĩmara faafõ ã ato yoita ã oni nono Macedonia ano.

*Cristoõxõ nõ keyokõi finõtiro*

<sup>14</sup> Aicho Epa Niosi, mĩ Cristo Jesús afara chaka potamana anã afeskafanõma. Nãskakẽ nõri afe inimai nõmãï aõxõ ãfe meka yoikatsaxakĩ yorafãfe tãpinõfo. Akka pirofomã nakas shara nachikomea nõ keyokõiichi xetetiro keskafaki, nãskafakĩri Niospa noko nĩchiano nokoõxõ keyokõiichi tãpitirofo ãfe meka shara. <sup>15</sup> Akka nõ meka shara Cristoõnoa yoimis keyokõiichi nikanõfo. Akka atirifãfe chanĩmara fakõikani, Nios fe ipaxakakĩ. Akka atirifãfe nikasharakanamax Jesús Ifofakanamax nakanax omiskõipakenakafo. <sup>16</sup> Akka na meka shara nikaifoma mã nakanax omiskõipakenakafo mẽra fokanax omiskõixikani, nãfãfemãï na meka shara nã nõ afara pisikõi xetemis keskara xetekatsaxakakĩ. Akka nã meka shara nikaifãfe nã nõ pirofomã nakas shara xetemis keskara xetemisfo. Nãskakanax Nios fe nĩpanakafo. Akka, ¿tsõa Niospa meka Jesúsnoa yoisharatiromẽ? Akka tsõa atiroma. <sup>17</sup> Akka fetsafãfe Niospa meka ato yoikakĩ kori fipaikani ãa ato pãrakaxõ. Nõ mato Niospa meka yoikai noko kopifakãfe ikaxõ ãa ato pãrakaxõ ato kori fĩaifo keskafakĩ nõkai mato askafamisma. Mã nõ tãpia nõ ãfe meka yoiaito Epa Niospa noko õisharakõi, nãatomãï noko nĩchinixakĩ. ãfe meka yoikai nõ kaxetiroma, Niospamãï noko õiaino nõmãï Cristo ãfe inaxõ.

### 3

*Jesús ato meka fena yoimis Pablo ato yoini*

<sup>1</sup> Askara nõ yoiaino, mã shinãiraka nã nõa nõ yoimesharai keskara. Maa. Nõa nõ yoimesharaima. Mã chaka shinãï. Akka fẽtsa

yonopaiyaito fětsari fetsa kirika kene fomaxotiro fetsafāfe òinõfo yonosharamiskē. Akka, ĵmā shināimē fetsafāfe nokoõnoa kirika kenenõfo noko yoisharakakī nō yonosharamiskē Niospa meka yoikī? Akka nō askara fichipaima. Akka, ĵmā shināimē nō mato kirika kene yōkaito kirika kenexō mā noko inānō nōri fetsafo inānō noko tāpinõfo nō mato mēraxō yoisharamiskē? Maa. Askara nō fichipaima. <sup>2</sup> Akka nā kirika kenea keskara nō fichipaima māmāi nā kirika kenea keskarakē, fetsafāfe mato òitirofo māmāi Nios Ifofasharakē. Mato òikakī nokori tāpitirofo nō Niosxō yonosharamiskē. <sup>3</sup> Akka mā mā isharakōia anā mā imis keskarama a Niospa fichipaiyai keskaraino. Nā noko òimana Cristo mātō òiti fetsafaa fena keskara mā inō. Nāskakē mā kirika kenea keskara. Mato òixō fetsafāfe tāpitirofo nō Niospa meka mato tāpimasharamiskē. Akka na kirika kene lapisi kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

<sup>4</sup> Iskafakī nō yoia, mā nōmāi tāpixō Niospamāi noko nīchinikē nō āfe meka mato yoinō Cristo āfe sharaõxō nō mato yoisharamis. <sup>5</sup> Akka nōa nō afara shara nō mato yoitiroma mā isharanō. Askatamaroko Epa Niospa āfe Yōshi Sharaõxō nō fetsafo tāpimatiro isharanõfo. <sup>6</sup> Niospa Yōshi Sharaõxō na meka fena nō ato yoimis Jesúsnoa nō Nios fe nīpaxatiro. Akka a Moisés keneniõnoa nō ato tāpimamisma, sharafiano keyokairoko nikanõfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapak-

enaka Nios ika ano nōmāi Cristo Ifofakē.

<sup>7-8</sup> Epa Niospa nōko xinifo israelifo nā ato yoipaiyai keskara ato yoini nikanōfo. Tokiri pāraki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiyai keskara nāroko sharafinakōia. <sup>9</sup> Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharapakexanō. Nā sharafinakōia afaa fetsakai askarama. <sup>10</sup> Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia. <sup>11</sup> Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

<sup>12</sup> Nāskakē mā nō tāpikōia Epa Niospa Jesúsnoa yoini keskara keyonakama. Nāskakē ranotama nō Jesúsnoa yorafo yoitiro. <sup>13</sup> Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni. <sup>14</sup> Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskarafori. A Moisés ato yoini keskara ato



kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoā keskara inōfoma. <sup>15</sup> Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe. <sup>16</sup> Askafikaxō iskaratīa a Moisés keneni keskara anā shinākaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima. <sup>17</sup> Niospa Yōshi Shara nō Ifofaax nofe ikaino afaa fetsa nōko ifo itiro, noko ikixikī. <sup>18</sup> Akka nōko ōitikai fēstoā keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano nō sharakōi ixii. Nāskakē fetsafāfe noko ōikakī tāpitirofo nō shara isharakē. Nā feisiti xinī chaxaino fafai keskara noko ōikakī nōko Ifo Jesús tāpitirofo afe keskaramāki.

#### 4

<sup>1</sup> Akka Epa Niospa noko shinākī noko yoini āfe meka shara Jesucristoōnoa nō yoifofāfōfāinō. Nāskakē nō shināchakaima, nō Niospa meka yoiki xateima. <sup>2</sup> Nāskakē nō afaa one chakafamisma rāfixikima, a afara one chakafamisfo keskafakī. Askatari nō tsoa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē. Nāskakē mā nokoki inimasharapainō, nā nō afarafo shara faito ōi. <sup>3</sup> Na meka shara Jesúsnoa nō yoimis nikakaspafono nā onea keskara. Nāskakē tāpikanamax oa fēstoā keskarāfo. Nāskakanax omiskōipakenakafo. <sup>4</sup> Nāfofi nā niafaka chaka āto ifoxō ato yoimis. Nāskaxō nā ōiti fēstoā keskara ato faano na meka shara Jesúsnoa

tāpitirofoma. Nā yora fēxō luz ota sharafiano ōitiroma keskarafō. Nāskaraxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano. <sup>5</sup> Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo mato Ifo inō. Nōko Ifokē aō noixō nō yonoxosharapai. Akka nō mato axosharapai Cristoōnoa mā tāpinō. <sup>6</sup> Niospa pena onifayoxoma fakishkē yoini pena inō. Nāskarari nō Jesús Ifofayamax nōko ōiti nā fakish keskara chakakōi ipaoni. Akka Niospa Jesucristoōxō nōko ōiti mēra noko chaxamashara aōxō nō tāpinō afe keskara sharakōimāki.

*Pablo yoini nō Jesús chanīmara faax nō isharatiro*

<sup>7</sup> Akka nō afaayamafekē Niospa āfe sharakōi noko mēra nanea nō āfe meka shara Jesúsnoa ato yoinō. Akka nā kesho noko keskarari akai afaama. Samama moshitiro. Moshifitirokē a mēra afara sharakōi nō nanetiro. Nāskarifiai nō afaayamafiano Jesús nofe rafea. Nāskakē yorafāfe tāpitirofo Niospa Yōshi Shara nōmēra nanea. <sup>8</sup> Nā nō imis keskara iskaratīa ē mato yoinō mā tāpinō. Noko chakafafiakakī noko xatemakanima. Nāskafixō nō afeskaimēti ixō, nō shināchakafikī mā nō tāpia Epa Niospamāi noko axosharafafainaito. <sup>9</sup> Noko noikaspakakī noko chakafapaimisfo. Nāskakaxō noko chīfafofāsafamisfo. Noko askafafiaifono Epa Niospa noko potaima. Nāskakatari noko retepaikakī noko tsefeya fafiafono Epa Niospa noko kexesharamis nō nayamanō. <sup>10</sup> Jesús niyoano retepaipaonifo keskafakī nokori nāskari fakani retepaikakī. Noko retepaifiaifono nōko Ifo Jesús noko kexesharai

noko retenõfoma. Nãskakẽ yorafãfe tãpitirofo mã Jesús nafianixakĩ anã otoax nikẽ. <sup>11</sup> Nõ Jesús yonoxonaito mẽxotaima noko retepaikani. Akka noko retepaifiaifono nõko Ifo Jesús noko kexesharai noko reteyamanõfo. Akka nõa nõ ifimetiroma nayamaxiki. Nãskakẽ tãpitirofo mã Jesús nafianixakĩ anã otoax nofe ikẽ. <sup>12</sup> Nãskakẽ Jesúsnoa nõ mato yoimis fetsafãfe noko retepaifiaifono mã chanĩmara faax mã afe ìpaxanõ.

<sup>13</sup> Akka Epa Niospa meka kirika ano yõra keneni iskafakĩ: “È Epa Nios chanĩmara fakõini. Nãskakẽ Niosnoa ã ato yoi,” ixõ kirikaki Niospa meka keneni yõra. Nãskarifiakĩ nõri Niospa meka chanĩmara fakõixõ nõ mato yoi. <sup>14</sup> Akka mã nõ tãpia nõko Ifo Jesús mã nafiakẽ Èpa Niospa anã õtofani afe ìpaxanõ. Nãskakẽ Apa Jesús otofani keskafakĩ mato yafi nokori otofaxii nõ afe ìpaxanõ. <sup>15</sup> Akka nõ omiskõikõi mato Epa Niospa meka yoi mã ãfe meka chanĩmara fakõinõ. Nãskakẽ yora ichapafãferi Epa Nios nikakõikaxõ, “Aicho, Epa Niosi, mĩ fãsi sharakõi,” faxinõfo.

<sup>16</sup> Nãskakẽ nõ omiskõifikĩ nõ shinãchakaima. Nõko Ifokai nõ kachikiri faima. Akka nõko yorari anã kerexma nõ omiskõiaino. Askafixõ nõko shinã mẽra mẽxotaima noko kerex fafafaĩni. <sup>17</sup> Akka a nõ niyoax nõ omiskõiyoai akai afaama, samamashta keyoi. Akka nõ Jesúsnoax omiskõiaito a noko sharakõi imai a keskarakai tsõa õiyomisma. Nãfori keyonakama. <sup>18</sup> Akka nã nõ omiskõiai shinãtamaroko nã nõ õiyomisma nõ shinãi. Nios ika anoxõ noko inimamapakenaka. Nãa nõ shinãi. Akka nã afaranã noko omiskõimanai samama keyoxii. Akka a Niospa noko chipo imai keskara

keyonakama.

## 5

<sup>1</sup> Akka ã mato yoinõ nikakapo. Pexe xiniãx pão ikax keyotiro. Nãskarifiã nã naino nõko yora keyotiro anã nõko fero mẽsho nõ mẽra inõma. Akka tsõakai noko yora fenafaxotiro. Epa Nios fistichi noko yora fena onifaxotiro. Akka mã nõ nai mẽra kaax nõko yora fena shara ixii. Epa Niospa noko yora fena shara faxõano a anã keyonakama. <sup>2</sup> Akka nõ fekaxtemis nõko yora fekaxkõimei. Nõko yora fenashara fapai nai mẽraxõ. <sup>3</sup> Akka nõ naax, ¿nõko fero mẽsho yoraya itiromamamẽ? Maa. Epa Nios fisti nõ Ifofamiskẽ noko yora fena shara faxotiro nõ afe ãpaxanõ. Nãskakẽ nõko fero mẽsho yoramais nai mẽranoax itiroma Epa Niospamãi noko yora fena faxõano. <sup>4</sup> Iskaratã nono mai ano niyoax nõko yora omiskõiyoi. Askafiax nõ nayopaima. Nõ nayoamano Cristo onõ noko yora fetsafaxoxiki nõ isharapakexanõ. <sup>5</sup> Nã Epa Nios fistichi noko onifani nõ afe ãpaxanõ. Nãskakẽ ãfe Yõshi Shara nõ mẽra nanea nõ tãpinõ noko yora fetsa faxoxiaino.

<sup>6</sup> Nãskakẽ nõ shinãsharafãini nono mai ano niyoxõ, nayoxoma, nõko Ifo Jesús ari kayoxoma mã nõ tãpia. <sup>7</sup> Nãskakẽ nã Jesús ika ano õiyamafikĩ nono mai anoxõ nõ chanĩmara fafafaãini. Nãskaxõ chipo nõ õixii Epa Niospa noko fetsafaano. <sup>8</sup> Akka mã nõ tãpisharakõia Epa Niospamãi noko yora fetsa inãino. Akka mã nõ nakĩ nõko yora nõ ratafainikai nõ sharafinãkõia ikikakĩ. Nãskakẽ nõ inimasharakõia mã nõ nai nõko Ifo Jesús femãi nõ ikikai. <sup>9</sup> Akka nono mai ano nõ niyoxõ nõko Ifo

nō yonoxosharayopai nokoki inimanō. Nāskatari nai mēraxori na fishisharapaiyai keskafakī nōko Ifo nō inimamapaisharakōi. <sup>10</sup> Akka nā chanīmara faafo tii Cristoki nokoxikani. Nāskatari noko yoipakexii nono mai ano niyoxō nō shara famismākī, askayamakī nō chakafamismāki. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesúsxō nō yonopai sharakōi.

*Pablo yoini Cristoōnoax nō Nios fe rafetiro*

<sup>11</sup> Akka Niospa noko yoia keskara nō ayamax nō rāfitiro. Nāskatari fetsafori nō ato yoipai nā Niospa ato yoiai keskara anōfo. Niospa noko tāpikōia nōmāi mēstekōi yoiaito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti māto shinā mēraxō mā shināpainō. <sup>12</sup> Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiaifo anorikai yoimisfoma āa āto shinā mēraxō shinākaxō yoimisfo kakapaiyanā. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā nokoōxō ato yoikī nokoōnoa mā ato yoisharatiro. <sup>13</sup> Chanīma, nō Nios noikī kerexkai nō yonoxofafāimis aōnoa fetsafāfe nikasharanōfo. Akka yorafāfe nokoōnoa yoimisfo iskafakakī: “Na Pablo feta yonomisfāfe shināsharamisfoma mēxotaima ato Niospa meka yoifofāsafamisfo omiskōifinafikakī,” ixō noko yoimisfo. Āa noko askafanōfokī mā nō tāpiakī Niosxō nō yonofikai mā āfe meka tāpinō. Akka nō

mēstekōi shināsharakī nō mato yonoxosharamis. <sup>14</sup> Cristo noko noikī noko yoini nō āfe meka shara mato yoinō. Cristo keyokōi yorafoōnoax naani. Nāskakē mā nō naa keskara a nō iyopaoni keskara ixikima. <sup>15</sup> Akka mā Jesús nayoni yorafoōnoax keyokōi a keskara shara ixiki. Nāskakē a nō chaka ipaoni keskara ixiima. Nāskakē nā nō apaiyai keskara fisti anā nō shinātiroma. Cristoōnoax nō yonosharaxotiro. Cristo āa nokoōnoax nayoni. Nafiano Epa Niospa āfe sharaōxō anā otofani.

<sup>16</sup> Akka nā Jesús chanīmara faafāfema fetsafoōnoa shināifo keskarakai nō anā atoōnoa anori shināpakenakama. Nōri anori shināyopaoni nō anā askapaima. Cristoōnoari nō chakakōi shināyopaoni. Nōkai anā aōnoa anori shināima. <sup>17</sup> Nāskakē Cristo nā Ifofaafo ato shinā fetsafaxōa anā shināyopaoni keskara inōfoma, fena keskara shara inōfo. A Niospa fichipaiyai keskara fena keskara nō ixii. Keyokōi fena keskara ixii. <sup>18</sup> Epa Niospa Cristoōxō noko fetsafaa anā nō noikaspanōma, nō afe rafenō. Askatari noko yoini aōxō āfe meka nō ato tāpimanō Epa Nios fe rafenōfo. <sup>19</sup> Epa Niospa Cristoōxō keyokōi yorafo afe rafemapai anā noikaspanōfoma. Cristomāi noko nāxonikē Epa Niospa a nō afara chakafamisnoa anā shināima. Nā Epa Niospa noko yoia keskafakī nānorikōi nō mato yoimis.

<sup>20</sup> Akka Cristo noko nīchini nō āfe meka mato yoinō. Nō āfe meka mato yoi nā Epa Niospa mato yoiai keskara. Epa Niospa nokoōxō mato yoi nā Cristo mato yoipaiyai keskafakī. Nāskakē nikakōikāfe Cristo mato nāxonikī mato chaka soax-oxiki. Nāskakē Cristo Ifofaxō mato chaka xatekāfe

Epa Nios fe rafexikakĩ. <sup>21</sup> Akka Cristo afaa chakafapaonima. Nāskafikē Apa Niospa nōko chakafo akiki nīchini. Cristo afaa chakafayamafiakatsaxakĩ noko nāxoni Epa Niospa noko omiskōimayamanō. Nā yora chaka keskarax nōko chakafoōnoax Jesús nani. Nāskakē nō Jesús Ifofaino Niospa noko ōitiro sharakōi nā nō afaa chakafamisma keskara, nokoki inimakōikĩ.

## 6

<sup>1</sup> Akka nō Nios feta yonomis āfe meka mato yoikĩ. Nāskakē nō mato yoisharapai Epa Niospa mato noisharakōiaino, mā shināmakiyamanō, āfe meka mā kachikiri fayamanō. Fetsafāfe anorima mato yoiaito nikayamakāfe. Askatamaroko Jesús meka shināmakiyamakāfe. <sup>2</sup> Taeyokĩ Niospa meka yoimisto kirika keneni iskafakĩ Niospa yoiaino:

Ē mato shināito, mā ea yoiaino ě mato nikai mā omiskōiaino. Ē mato ifinō, ě mato axosharaxiki, ixō yoini Epa Niospa. Nāskakē nikasharakāfe iskaratīari Epa Niospa noko axosharapai noko ifixii.

<sup>3</sup> Nōkai mato afaa chaka yoipaima tsōa noko chakafayamanōfo. Akka nō chaka niaito ōikaki a Nios chanīmara faamafāfe noko mekafatirofo. Nāskakē nō afaa chakafapaima. <sup>4</sup> Akka nā nō keyokōi Niosxō aka keskara nō mato ōimamis nōmāi yonoxokatsaxakĩ. Noko omiskōimafiaifono nō tenekōimis. Askatari fekaxteifinakōita nō tenekōimis. Noko chakakōi famisfo, noko askafafiaifono nō tenekōimis. <sup>5</sup> Nāskakaxō noko koshamisfo, askatari karaxa mēra noko ikimamisfo. Nāskatari yora chakafāfe noko

noikaspakakī fāsi noko mekafamisfo. Noko askafafiaino fekaxtekōiyanā nō yonomis. Askatari nō oxa tenekōimis. Nāskaxri nō fonāikōimis. <sup>6-7</sup> Noko askafafiaifono afaa chakafatama nōko ōiti mēraxō nō afaa chaka shināima. Nō Cristo fe rafeaito nā noko yoimis keskara mā nō tāpia. Noko chakafafiaifono nō atoki ōitifishkitama. Fena fenakima nō tenekōimis. Nāskax fetsafo fe rafepaikī nō ato sharafa fafāfāimis Niospa Yōshi Sharaōxō nō ato askafamis ato pārakīma nō ato noikōimis. Nō askakī keyokōi nō mato ōimatiro nōmāi Niospa yonomatixō. Satanās noko afara chakafamapafiaito Niospa Yōshi Sharapa nā Nios keskara shara noko imaino āfe Yōshi Sharaōxō nō afara chaka potatiro. <sup>8</sup> Akka fetsafāfe nokoōnoa meka shara yoifiaifono fetsafāferi nokoōnoa meka chaka yoimisfo. Akka fetsafāferi na yorafo sharakōira noko fafiaifono fetsafāferi noko ĭchamisfo. Nō chanīmakōi yoifimiskē noko feparamisfo ixō nokoōnoa fetsafāfe yoimisfo. <sup>9</sup> “Pablo fe rafeakai tsoama. Nōkai ato ōimisma,” noko fafiaifono akka fetsafāfe Nios Ifofakōikaxō noko noikani. Nāskatari nō napaiifax nō nia. Noko omiskōimafiakakī noko tsōa reteama. <sup>10</sup> Akka nō shināmitsafiaito nōko Ifo Niospa noko inimamamis. Akka afaamaisfixō nō Niosxō nō fetsafo imasharakōimis, Nios Ifo shara faifono. Nō afaamais keskarafifax nō aya a Niospa noko ināi. Akka nā keyokōi Niosnā nōkonāri.

<sup>11</sup> Efe yora mīshtichi Corinto anoafāfe, nā nōko ōiti mēraxō nō shināi keskara nō mato yoimis. Nō mato fomāmisma. Keyokōi nōko shinā mēraxō nō shināi keskara nō mato yoimis mā tāpinō.

<sup>12</sup> Akka nō mato noikaspamisma. Akka māroko



noko noisharamisma. <sup>13</sup> Akka iskaratĩa ě mato yoi āpa fake noisharakĩ yoitiro keskakakĩ, nokori noisharakãfe nã nõ mato noiai keskakakĩ.

*Nã Nios chanĩmara faafãfema akaifo keskara ayamakãfe*

<sup>14</sup> Nã Jesús chanĩmara faafoma fe rafeyamakãfe. Akka na yora Nios Ifofaafãfe shinãifo keskarakai nã yora chakafãfe shinãkanima. Nãskarifiyai pena fe fakish osinãtiroma. <sup>15</sup> Nãskarifiakĩ Cristo feta Satanás anoris shinãtirofoma. Akka nã Cristo Ifofaafãfe fichipaiyaifo keskara nã Cristo Ifofaafãfema askara fichipaikanima. <sup>16</sup> Nã Cristo chanĩmara faafãfe ichanãmisfo Epa Nios kĩfinõfo. Akka nã Ifofaafoma ato fe ichanãtirofoma afara nimofo fakaxõ kĩfitirofo na nõko niosra ikaxõ. Nãskakẽ nã rafe osinãtiroma. Akka afãfekai Epa Nioskõi kĩfipaikanima. Akka Epa Nios nõ mēra ika. Nãskakẽ nõ Niospa pexe keskara. Nõko Nios nia. Epa Niospa yoini iskakakĩ:

Ĕfi ato fe ikikai, ato fe rafexikĩ. Ĕ āto Nios ikaino afo efe yora ikani, ixõ yoini. <sup>17</sup> Askatari Epa Niospa yoini iskakakĩ:

Akka nã Cristo chanĩmara faamafãfe akaifo keskara ayamakãfe. Ato fe rafeyamakãfe afaa chakafaxikākima. Mã askaino ě mato ifikai, ixõ yoini. <sup>18</sup> Askatari nã afama mĩshti atiroto ato yoini iskakakĩ:

Akka ě mato Epa ixii. Akka mã ěfe fakefo ixii, ixõ nõko Ifo Niospa yoini.

## 7

<sup>1</sup> Ĕfe yora mĩshtichi, Epa Niospa nã noko yoiyoni keskara shara. Nãskakẽ nõ isharanõ keyokõichi

nōko chaka nō xatenō. Afarafāfe nōko yora iya-  
mai nōko ōiti mēraxō noko chakafamatiro nāfo nō  
xatekōinō sharakōi ixiki. Nō Epa Nios noikōiax a  
keskara shara nō ipai.

*Corinto anoxō chaka shināyopaonifo. Akka  
iskaratīa mā shara shinākani*

<sup>2</sup> Akka nā yora fisti keskara nō inō noko  
noisharakāfe. Nōkai mato chakafamismaki.  
Askatari nō mato afaa chakafamamisma, askatari  
nō mato pāramisma. <sup>3</sup> Ēkai nā ē mato yoiai  
keskafakī mekakī chakafakī ē mato yoimisma.  
Akka ē nayoxoma ē mato mēxotaima noikōifafāini.  
Nāskatari mē nafiaxō mēxotaima ē mato noikōixii.  
Nāskakē tsōa noko paxkanā fatiroma nā yora fisti  
keskaramāi nō ikē. <sup>4</sup> Mā nō tāpikōia mā noko  
noikōiyanā, mā Jesús Ifo sharakōi fakē. Nāskakē  
nō yorafo yoimis mā isharakōimiskē. Nāskatari nō  
omiskōifi nō inimakōimis.

<sup>5</sup> Akka nā nō Macedonia ano nokoitatīa nō te-  
neama, mēxotaima fanīma mīshtinoax fekaxteaifāfe  
ōi. Akka nō shināchakakōimis. Askatari a Nios  
Ifofaa fetsafori nō ato shinākōimis, mā nōko Ifo  
Jesús kachikiri faafora ixō. <sup>6</sup> Akka nā shināmitsaifo  
Niospa ato inimamamis. Nāskakēri nokoki Tito  
nīchiano nō inimakōimis. <sup>7</sup> Akka mā nokoki Tito  
nokoxō noko inimama noko yoia iskafakī: “Cor-  
into anoafāfe ea inimamakōiafo,” ixō Titopa noko  
yoia. Askara nō nikai nō inimakōia. Askatari noko  
yoia mā eōnoa yoikī iskafakī: “Nō Pablo shinākōi  
nokoki samamashta nokopainō,” ixō mā yoikē:  
“Nāskaxori nōko ōitinī nō shinā chanīma nō afara  
chakafamis. Akka nōkai anā askapaima. Nō Pablo  
shināi,” ixō mā yoiaino Titopa ea yoia. Nā keskara  
nikai ē inimai finasharakōi.

<sup>8</sup> Akka ẽ mato kirika kenexõ manamakĩ ẽ mato shinãmitsamana. Nãskax ẽri shinãmitsakõiyoa. Akka anã ẽ shinãmitsaima. <sup>9</sup> Akka iskaratĩa ẽ inimakõi. Akka ẽ mato shinãmitsamanax ẽ inimaima. Akka mã shinãmitsayanã mã Epa Nios kĩfiti iskafakĩ: “Epa Niosi, nõ afara chakafakĩ noko raefafe nõ afara chakafamiski,” ixõ mã yoikĩ. Nãskakẽ ẽ inimasharakõimis. Mã askafaino Epa Niosri matoki inimasharakõi. Akka ẽ mato kirika kenexõ manamakĩ ẽ mato yoikĩ chakafaama. Askatamaroko ẽ mato yoisharakõia mato axosharayanã. <sup>10</sup> Akka nõ shinãkĩ iskafatiro: “Ooa, ẽ afara chakafakĩ, Niosri ẽ chakafaa,” ixõ shinãkĩ nõko chaka nõ xatepaitiro Epa Nios Ifofapaiĩ. Nõ askaito õikĩ Epa Niospa noko ifitiro nõ afe ãpaxanõ. Nãskaxõ nõ shinãtiroma iskafakĩ: “Ooa, ẽfe chaka ẽ xateama shara ẽ ikerana. Niosri ẽ Ifofaama ẽ shara ikerana,” ixõ anori nõ shinãtiroma. Akka nã chanĩmara faamafãfe nõ shinãi keskara shinãkanima. Iskafakĩ shinãmisfo: “Ooa, nõ afara chakafaa,” ixõ shinãkani ãto õiti mẽra shinãmitsakanima Nioskai shinãpaikanima. Nãskax nakanax Epa Nios fe ipanakafoma. <sup>11</sup> Akka mãkai askarama. Shinãkapo. Mã mãto õiti mẽraxõ mã mã shinã anã mã Nios Ifofai mãto chaka xatepaikĩ nã Niospa fichipaiyai keskafakĩ. Nãskax mã ratekõia Niospa keyokõi noko omiskõimaxira ikax. Nãskakẽ mã mã itipinĩkõia ika a afara chakafaifo ato omiskõimaxiki. Nãskaxõ mã fãsikõi ato yoia ãto chaka xatenõfo. Nãskakẽ mã mã noko isпамãkai ato keskarama. Nãskakẽ mã ea fichisharapaikõi ẽ mato õikanõ mã isharakõiyamãkĩ. <sup>12</sup> Akka ẽfe kirika kene fixõ mã ea noiyanã mã ea nikakõisharamis.

Akka ẽ kirika keneama, nã feronãfãke afara chakafaaõnoa omiskõimakãfe ixõ. Askatari nã feronãfãke omiskõimanafoõnoari ẽ kirika keneama. Akka ẽ mato kirika kenexona mã tâpinõ mã ea noimãkai. Akka mã ea nikakõimis. Nãskaxõ mã tâpitiro mãmãi ea noikĩ Niospa ferotaifi.

<sup>13</sup> Nãskakẽ nõ inimasharakõi, mãmãi noko noisharakõiaino nikakõisharayanã. Akka Titori matoõnoax inimasharayamea. Nã Tito inimaito õi nõri inimaifinasharakõiyamea. <sup>14</sup> Akka Tito kayoamano ẽ yoiti iskafakĩ: “Na Corinto anoafo sharakõifo,” ixõ ẽ yoiti. Nãskakẽ Tito mato mẽra kaano mã ifisharakõiyamea. Nãskakẽ ẽ matoõnoax rãfiyameama. Akka chanĩma fisti nõ mato yoimis. Nã ẽ matoõnoa Tito yoia keskara chanĩmakõi Titopa mato õia. <sup>15</sup> Tito matoki nokoxõ õia mã rateaito mato õita noko Titopa ferateneira ikax. Nãskakẽ pishta rateyanã mã Tito nikakõita. Nãskakẽ Titopa mato shinãkĩ, mato noikĩ finakõi. <sup>16</sup> Ẽri matoki inimakõi. Akka iskaratĩa mẽ tâpia nã ẽ mato yoiai keskara mã amiskẽ.

## 8

*“Afarayaxõ fetsafo inãsharakãfe,” ixõ Pablo Corinto anoafo yoini*

<sup>1</sup> Akka meka fetsari ẽ mato yoinõ mã tâpinõ. Mã Epa Nios Macedonia anoxõ chanĩmara faafono Epa Niospa ato noikĩ ato shinã mẽraxõ ato shinãmashara fetsafori kori inãsharakõinõfo. <sup>2</sup> Akka Macedonia anoax omiskõifikakĩ Niosnoax inimakõikakĩ, afaayamafiakaxõ nã yora afaamaisfo ato afara fetsa inãsharakõiafo. <sup>3</sup> Akka nã ẽ õia keskara ẽ mato yoinõ. Fetsafãfe

afaayayamafiakaxō fetsafori ato afara ato ināsharakōiafo. Ato afaa fīshkofafoma. Nāskakē atonā afaa ichapa nēteama. <sup>4</sup> Iskafakī ea yoiāfo ato ināsharapaikī: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faafo. <sup>5</sup> Nō shināyamea kori fistis noko inākanira ixō, Jerusalén anoāfo a Nios Ifofafo ato foxopaikī. Akka noko kori ināyokaxoma taefakī Nios ināyameafo, iskafakī yoiyanā: “Ifo, nōfi mefe yorakī nā mī noko afara amapaiyai keskara mī noko yoitiro,” ixō yoiyameafo. Nānori yoikāta nokori yoiyameafo iskafakakī Niospa fichipaiyai keskafakī: “Nōri nō mato nikakōinō,” ixō noko yoiyameafo. <sup>6</sup> Titopa taefakī mato yoiyoni iskafakī: “Māto korifo ichafakāfe a afaamaisfo Jerusalén anoāfo ato ināxikakī,” ixō mato yoiyoni. Nāskakē nō Tito yoiyamea iskafakī: “Nā mī yoimis keskafakī anā ato yoife nā afaamaisfo Jerusalén anoāfo ato kori inānōfo. ‘Mā ato noikī mā ato kori inātiro,’ Corinto anoāfo ato yoife,” ixō nō Tito yoiyamea. <sup>7</sup> Akka mā Jesús chanīmara fakī finakōiyanā mā Niospa meka mēstekōi yoimis, āfe meka tāpisharakōiyanā. Chanīmakōi mā Jesús yonoxosharakōiyanā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfofā nā mā imis keskayanā.

<sup>8</sup> Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyanā mā ato

ināsharatiro. <sup>9</sup> Mā mā tāpia nōko Ifo Jesucristo nai mēranoax nāmā fotoyoamax afama mīshtifoya iyopaoni. Afaakai yopapaonima. Nāskafixō noko noikōikī āfe afama mīshtifo keyokōi potāferani. Nāskax nokoōnoax afaamais iyopaoni nō aōnoax isharapakexanō.

<sup>10</sup> Akka nā ē shināinoa ē mato yoinō mā tāpinō. Akka mā xinia fisti finōa mākai inimakōiyānā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaikī mā fiyamea mā mekea ato chipo ināxiki. <sup>11</sup> Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyaiti ato inākāfe. <sup>12</sup> Akka mā ato ināpaikī mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxoōma mā ato ināitori nāri Epa Niospa tāpia. Nāskakē inimakōi.

<sup>13-14</sup> Akka ē mato iskafakī yoima: “Ichapakōi ato inākāfe,” ixō ē mato yoima. “Askatari keyokōi mā ato ināx mā afayaima,” ixō ē mato yoima. Akka iskaratīa mā afara ichapaya. Nāskakē nā afara yopaifo mā ato inātiro. Akka māri afara yopaito nāfāfe afara ichapayakaxori matori inātirofo. Mā askai mā ranā mā kexenōnāsharax mā isharakōitiro afaa yopaxikima. <sup>15</sup> Akka kirika ano Niospa meka kenea iskai: “Akka nōko xinifo tsōa istomaxō a piaifo Niospa ato ināpaoni. Akka nā ichapa fiato texefapaonima. Akka nā ichapama fiatori afaa yopapaonima,” ixō kirika ano Niospa meka yōra keneni. Nāskakē yora fetsafo nō afara ināito, Niospari noko afara fetsafo noko inātiro nō afaa yopayamanō.

### *Tito fe rafeafo*

<sup>16</sup> Ē matoōnoa shinākōiai keskafakī Titopari āfe ōiti mēraxō mato shinākōi, Epa Niospa shināmanaino. Nāskakē nō Epa Nioski inimakī nō aicho fai. <sup>17</sup> Akka iskafakī nō yoiyamea: “Corinto anoafo anā ato ōitāfe ato yoisharaxikī,” ixō nō Tito yoiyamea. Nānori nō yoiaino inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiiai fistiōnoax kaima. Āari matoki kasharapai kai. <sup>18</sup> Akka nā nofeta Nios Ifofamis fetsa nō Titoya nīchi. Nā nofe yora, nāatori Jesúsnoa ato yoisharamis. Nāskakē aōnoa keyokōichi meka shara yoimisfo. <sup>19</sup> Akka nā Nios chanīmara faafo tiito ichanākaxō na feronāfake katonifo, nofeta nā kori yopaifo foxōikanō. Nios shinākī na kori nō ato ināyanā nōko Ifo sharara fanōfo. Askatari nō mato feta nō ato ināpai tāpinōfo nō ato axosharapai.

<sup>20-21</sup> Nā afaamaisfo nō ato kori foxosharapai. Nāskakē yorafāfe ferotaifi nō ato ōimasharapai noko chakafakī mekafayamanōfo. Na kori ichapa nō ato foxosharapai noko iskafanōfoma: “Nōko kori ranāri oneafo,” noko fanōfoma. Nāskakē nōko Ifāfe ferotaifi nā yorafāfe ferotaifiri nō ato ōimapai nō isharakōixō.

<sup>22</sup> Akka nā nofe yora nā Jesús Ifofamis fetsa Tito yafi nō mato nīchi. Nā feronāfake mā nō ōimis nāato Jesús chanīmara fakōimis. Nofeta Jesús yonoxosharakōimis. Akka nāato mato nikamis mā Jesús Ifofasharakōixō nā afaamaisfo mā ato ināsharakōiuito. Nāskakē mato ari kapaimis mato feta ato shara faxiki. <sup>23</sup> Akka mā mā Tito ōimiski. Nāato efeta mato yonoxosharamiski. Nā

e fe rafemis Jesús yonosharaxoxiki. Nã Jesús chanĩmara faafo raferi afe mato ari fokani. Akka nã Jesús chanĩmara faafãfe ichanãkaxõ ato katonifo mato ari fonõfo. Nã rafeta Nios Ifofasharakõimisfo. Nãskakẽ ato katonifo mato ari fonõfo. <sup>24</sup> Akka mato ari nokofaifãfe ato ifisharakõikãfe nã Nios Ifofaafo ato katonifo ato tãpinõfo mã ato ifisharaito. Mã ato askafaino nã ã matoõnoa yoisharamis keskara tãpitirofo chanĩmakõikẽ.

## 9

*Nã Nios Ifofaafãfe Corinto anoafõ fetã Macedonia anoxõ nã Nios Ifofaa fetsafori ato kori manamanifo*

<sup>1-2</sup> Akka nono Macedonia anoxõ ã kirika kenexõ ã mato fomakĩ ã mato yoikĩ iskafapaima: “Ato kori fomakãfe,” ixõ ã mato yoipaima. Akka mẽ tãpia mã xinia fisti aka nã Jesús chanĩmara faa fetsafãfe afara yopaifãfe mã ato inãpaiyaito. Akka ã Macedonia anoafõ ã yoikĩ iskafaa: “Acaya anoxori ato kori fomapaikani Judea anoafõ,” ixõ ã yoia. ã ato askafaito nikakaxõ akairi ato kori fomasharapaikani. <sup>3</sup> Nãskakẽ ã Tito yafi nã afe rafeafo ã matoki nĩchi nã ã matoõnoa yoisharai keskara chanĩmakõikẽ tãpinõfo. ã Macedonia anoafõ ato yoimis iskafakĩ: “Nã Corinto anoafãfe mã itipinĩshara faafo ato kori fomaxikakĩ,” ixõ ã ato yoia. Akka ã Tito yafi a afe rafeafo ã nĩchi mato ano nokokaxõ õinõfo nã ã matoõnoa ato yoia keskara chanĩmamãkĩ. <sup>4</sup> Akka Macedonia anoafori e fe foaifono ã ato fe mato ano nokoxõ õia mã kori ichafayamano ã mãto rãfiaino mãri mã rãfipaitiro. <sup>5</sup> Nãskakẽ ã shinã Tito yafi afe rafeafo rekẽ mato



ari nīchixiki mato feta kori itipinĩfanõfo ato fo-maxikakĩ nã afaamaisfo. Akka afetiama mã mã shinãxõ yoiyoni: “Nã afaamaisfo nõ ato kori fo-manõ,” ixõ. Akka ã mato yoiama: “Ato kori inãkãfe,” ixõ. Mãakõĩ mã ato inãĩ. Akka nãskara shara mã ato inãpaiki mã ato inãtiro.

<sup>6</sup> Nãskakẽ shinãsharakãfe. Akka nõ fimi exe fisti fanaxõ ichapa fitiroma. Akka nõ fimi exe ichapa fanano nõ fimi exe ichapa fitiro. Nãskarifiakĩ nõ fetsafo afara ichapama inãkẽ nokori Niospa ichapama inãxii. Akka nõ inimayanã fetsafo ichapa inãito nokori Niospa ichapa inãtiro. <sup>7</sup> Nã ãto shinã mēraxõ shinãifo keskafakĩ fetsafo inãtirofo. Nãskakẽ iskafakĩ shinãtirofoma: “Ooa, ã ichapama inãpaifiaito ea yõkarifaito ã inã.” Askatari iskafakĩ shinãtirofoma: “Akka ã inãyamaino ekeki õitifishkitiro. Akka ã inãĩ ekeki õitifishkiyamanõ,” ixõ anori shinãyamakãfe. Askatamaroko inimayanã inãkãfe. Nã fetsafo ato afara inãĩ inimamis nã Niospa noikõĩ. <sup>8</sup> Akka nã mã fichipaiyai tii keyokõĩ Niospa mato inãtiro afara sharafo fetsa fetsatapafõ mã afaa yopanõma. Askatari nã afara yopaifo mã ato inãno, Niospa keyokõĩ tãpia mato sharafa fafafaĩtiro mãri fetsafo shara fanõ. <sup>9</sup> Niospa meka aõnoax kirikaki kenea iskai:

Feronãfake sharapa nã afaamaisfo afara ichapa ato inãsharamis. Nãskakẽ Epa Niospa nã feronãfake axosharaino mēxotaima ato afara inãsharatiro, ixõ keneni. <sup>10</sup> Niospa fimi exefo onifani. Nãskakẽ nõ fimi exe fanatiro. Chipõ Niospa ãfe fanafõ foaimasharaxotiro pisharanõ. Nãskarifiakĩ mã afara yopaito Niospa mato inãsharatiro. Afara ichapakõĩ mato inãno mã inimayanã nã Nios

Ifofafo Jerusalén anoafo mā ināsharafāitiro.  
 11 Chanīma, Niospa mato afaa fīshkoima afara ichapa mato ināi māri ato afara ichapa inānō. Akka nā afara yopaifo mā ato ināi nāfo nō ato foxoxii. Nāskakē inimayanā yoixikani iskafakī: “Aicho Epa Niosi, mī fāsi sharakōi,” ixō yoixikani.  
 12 Akka mā ato afara ināsharaino nā afaamaisfāfe fixikani. Nāskakē mā fīkaxō inimayanā Epa Nios yoixikani iskafakakī: “Aicho Epa Niosi, mī noko shara famis,” ixō yoixikani. 13 Mā ato afara ināsharano nā afaamaisfo inimakōixikani mā ato ināsharano. Nāskakē yoikī iskafaxikani: “Aicho Epa Niosi, nā noko afara ināifāfe mī meka nikasharakōimisfo. Jesús nōko Ifo mia famisfo. Mī ato yoia keskafakī noko ināsharafo. Fetsafori nāfāfe afara ato ināsharafo. Nāskakē mā nō ato tāpikōia chanīmakōi mī Fake Jesús āto Ifokōi,” ixō nā afaamaisfāfe yoixikani. 14 Nāskakē mato Epa Nios kīfixoxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharafo. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani. 15 Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

## 10

*“Niospa ea nīchini Jesúsnoa ē mato yoinō” ixō Pablo ato yoini*

1 Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mitsisipato noko yoimisma. Noko yoikī

fenãmäshta noko yoisharamis nõ äfe meka nikasharakõinõ. Nãskarifiakĩ ãri Cristoõxõ mato fenãmäshta yoisharapai mã tãpinõ. Akka eõnoa yoikĩ iskafamisfo: “Pablo nofe ixõ fenãmäshta noko yoiaito nõ õimis. Nãskafixõ noko kirika kenexoni mitsisipakai noko kirika kenexonaito nõ õimis,” ixõ ea yoimisfo. <sup>2</sup> Ë matoki nokoxõ fãsi mekakai ã ato yoipaima ea nikanõfo. Askafixõ ea nikayamafiaifono fãsi kerexkai ã ato yoitiro. Akka nã ea chakafakakĩ mekafaifo ato nikayamakãfe. Akka eõnoa yoi iskafamisfo ãa chanĩkani iskakani: “Pablo noko yoi nã Nios Ifofaamafãfe yoiaifo keskara. Niospa shinãõxõkai noko yoima,” ixõ yoimisfo. Akka ã matoki nokoxõ ã mato yoitiro nã Nios Ifofaamafãfe shinãifo keskara ã mato yoimisma. Niospa shinãi keskara fisti ã mato yoimis. Akka mẽ nokoxõ fãsi mekakai ã ato yoixii tãpinõfo. <sup>3</sup> Chanĩma, nono mai ano nõ ika nã Nios Ifofaafoma fe. Akka nã Nios chanĩmara faamafãfe fetsafo finõpaiyaifo keskai nõkai askamisma nã noko noikaspaifo ato finõxiki. <sup>4</sup> Akka a Nios Ifofaafoma a Satanãs nikakĩ mato chanĩkĩ tãpimapaikani mã anã Jesús Ifofayamanõ. Mato pãrapaikani. “Nõ Nios Ifofara,” ikani. Askatamaroko nõ Nios nikakĩ nõ mẽxotaima yoimis chanĩmakõi. Nãskaxõ Nios äfe sharaõxõ nõ ato xatematiro afara chaka anã yoiyamanõfo. <sup>5</sup> Epa Niospa noko yoiaino nõ fetsafo tãpimatiro ãa chanĩaifo, “Nõ Niospa meka tãpisharakõiakĩ,” ikanaifo, kakapaiyaifo. Akka nõ Niospa sharaõxõ fetsafo nõ ato tãpimatiro nã chanĩmisfo Niospa meka tãpisharafoma. Shara shinãfoma. Epa Nios Ifofaima. Niosxõ nõ ato yoimis Nios Ifofanõfo.

<sup>6</sup> Akka ea Jesús nĩchini ãfe meka ẽ mato yoinõ. Nãskakẽ mã Jesús yafi ea nikakõixõ mã anã afaa chakafayamaino ẽ mato afeskafatiroma. Akka mã noko nikakaspaito ẽ mato omiskõimatiro.

<sup>7</sup> Akka mã õikĩ shinãi oa shara keskaraxõ fetsafãfe yoiifono iskafakĩ: “Cristo ea nĩchini ãfe meka ẽ mato yoinõ. Akka Pablokai ea keskarama,” ixõ mato yoimisfo. Akka nãfãfe shinãsharakaxõ tãpitirofo eari Cristo nĩchinikẽ ãfe meka shara ẽ mato yoinõ. <sup>8</sup> Nõko Ifo Jesús ea yoimis keskara ẽ mato yoitiro. Mato afaa chakafamatama nõko Ifo ẽ mato Ifofamasharapai mato õiti fẽpeaxosharaxiki. Ẽ anori mato yoi ẽa kakapaitama, ẽroko mato yoisharapai. Ẽ anori mato yoikai ẽ rãfima. <sup>9</sup> Akka ẽ mato kirika kenexõ ẽ mato ratepaima mã mesenõma. <sup>10</sup> Akka fetsafãferi eõnoa yoikĩ iskafamisfo: “Pablo noko kirika kenexokĩ noko feratekõiaito nõ õimis. Akka askafiax nofe ikẽ nõ õia afaamakõi nõ õimis. ãfe mekakai mitsisipama,” ixõ eõnoa yoimisfo. <sup>11</sup> Nãnori eõnoa yoifimisfono ẽ mato ari samama kaxõ ẽ ato tãpimaxii. Nã ẽ mato kenexona keskafakĩ nãnorikõi ẽ mato yoixii.

<sup>12</sup> Fetsafãfe mato yoimisfo iskafakĩ: “Nõfi afara tãpikõiakĩ nõ mato tãpimasharakõitiro,” ixõ mato yoimisfo. Nãskarafo ichanãkanax ãa ranã yoinãkani iskakani: “Noko keskarakai tsoama. Nores fisti nõ tãpisharakõia,” ikanax kakapaimisfo. Nãfo tatimakõifo afaakai tãpiafoma. Nãskakaxõ nãfãfe anorima afara chaka yoimisfo. Akka ẽkai ato keskarax ẽ sharakõi ẽ itiroma ẽroko ato keskarax. <sup>13</sup> Akka nõkai anori yoipaitiroma. Nã Niospa noko yoiai keskara fisti nõ mato yoitiro. Noko yoini ãfe

meka shara fisti nõ mato yoinõ. Nã fisti nõ mato yoimis. Akka mã ika nã Niospa ea nĩchini ano. Akka ẽ kani Corinto anoxõ mato Niospa meka tãpimaxiki. <sup>14</sup> Nãskakẽ ori fetsa ari ẽ kanima, nã ea nĩchini ano ẽ kani. Akka nã nõ mato yoiai keskara chanĩmakõi. Nõkai kakapaimisma. Nã Niospa noko yoiai keskara fisti nõ mato yoitiro. Akka nõ mato Niospa meka yoikĩ taefatani Jesucristoõnoa meka shara mã nikamiskẽma. <sup>15</sup> Akka nã ẽ kamisma anoxõ fetsafãfe ato yoiafono nõ ato yoia ixõ nõ ato yoimisma. Akka nõ mato yoi nã nõ mato afara axosharamis fistiõnoa. Akka nã fetsafãfe mato axomisfoõnoa nõ yoimisma. Akka mã mã Jesús nikasharai. Nãskapainõ. Mẽxotaima mã nikasharakõifafãinõ. Akka mã ea ifisharakõiano mẽxotaima ẽ mato yoisharatiro nã Niospa fichipaiyai keskafakĩ. <sup>16</sup> Nãskakẽ mai fetsa ari chaikõi mato finõfãi ẽ kapai Jesúsnoa ato yoixiki nã Niospa meka nikamisfoma ari. Akka nãrixõ mã fetsafãfe ato yoiafono nõ ato yoia, nõ ipaima fetsafo imis keskai. Nõkai fetsafo ato yono xĩtikapaima. <sup>17</sup> Akka kirika ano Niospa meka kenea iskai: “Akka tsõakai ãa yoimesharatiroma iskai ẽ afama mĩshti tãpikõiakĩ ikax ãa kakapaitiroma. Askatamaroko nõ yoisharatiro nã afara sharafo nõko Ifãfe aka,” ixõ kirika ano yõra keneni. <sup>18</sup> Akka fetsa ãa yoimesharai akai afaama. Akikikai Nios inimatiroma. Akka Niospa fetsa na feronãfake sharakõi faax akiki inimakõitiro.

## 11

*Pablo ato yõani ãa chanĩkani noko Niospa nĩchiaki nõ Niospa meka mato yoinõ imisfoõnoa*

<sup>1</sup> Iskaratīa ě mato yoinō, nā yora shināsharayamaito yoiai keskara nānorikōi ě mato yoifikīkai askarakōi ě mato yoima. Nā mā ea nikamis keskafakī iskaratīa ea nikasharakāfe. <sup>2</sup> Feronāfāke kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ě mato Nios Ifofamakī ě mato kexesharani. Nāskaramāi Epa Niospa fichipaiyaino. Nāskakē mēxotaima ě mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. <sup>3</sup> Nāskakē ě shināchakakōi Satanás Eva ani keskafakī fetsafāfe matori pārayamanōfo, mato pāraifono mā anā Cristo noinōma. <sup>4</sup> Ooa. Fetsafāfe mato pārapaikani. Nō Jesúsnoa mato yoimis keskara anori mato yoikōiyamafiaifono mākai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoimis keskara anorikai afāfe yoikanima. Jesúsnoa anorima mato yoifiaifono mā ato xatemanama. Mā ato nikayanā mā yoimis iskafakī: “Aicho, mā nofe isharpainō,” ixō mā ato yoimis. <sup>5</sup> Akka mā shināi nāfāfe Niospa meka yoisharakōimifora ixō. Akka askafikaxō ea finōfafoma. <sup>6</sup> Akka, ĵmā shināimē ě yoisharatiroma? Akka ě Niospa meka tāpisharakōia. Nā ě mato yoiai anori mēstekōi. Mā mā ea tāpikōia ě mato Niospa meka xafakīakōi yoimis. Nā keskara ě mato ōimafāāini.

<sup>7</sup> Nā ě mato Niospa meka yoimis chāikai ě mato

afaa yōkamisma. Ēkai mato afaa fīamisma, koriri ē mato yōkamisma. Ōitsai, ē mato chakafairaka ē mato kori fīakīma. Akka ē Niospa meka shara Jesúsnoa ē mato yoimis Niospa fakefo mā inō. Ē mato askafai afaamais keskara ē imis mā Niospa meka tāpisharakōinō. <sup>8</sup> Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskararaka nā kori fii mato Niospa meka yoi, ē mato yonoxomis keskaraxō. <sup>9</sup> Ē mato fe imis chāikai ē afara yopafikī ē mato fekaxtefamisma. Akka Macedonia anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama. <sup>10</sup> Cristo āfe meka chanīmakōi. Nāskarari nā ē mato yoiairi chanīmakōi. Nāskakē Acaya mai anoxō nā ē mato yoiai keskara ea tsōa xatematiroma. <sup>11</sup> Ē mato anori yoikī, ğē mato noimamē? Maa. Anorikaima Niospa tāpikōia ē mato noikōi.

<sup>12</sup> Nā ē mato yonoxomis chāi ē mato afaa fīapaimisma. Iskaratīari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoimisfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma. <sup>13</sup> Akka nāfo chanīmisfo. Ē ikai keskara ipaifikani tsoa askakōimisma. “Cristo noko nīchia aōnoa āfe meka nō mato yoinō,” ixō mato yoifikani afokai Cristo fe rafemisfoma. <sup>14</sup> Chanīma, Satanás nokoki nokotiro nā Niospa āfe ājiri fafeai ōitsa. Nāskarato noko yoitiro iskafakī: “Ēfi mato xafakīa yoikai,”

ixõ noko feparapaitiro. <sup>15</sup> Akka nã Satanás yonoxomisfori nã keskara itirofo. “Nõri nõ Nios yonosharaxomis,” ixõ noko pãrapaikani. Nãskaifãfe õikĩ Niospa ato omiskõimakĩ finakõixii. Nãskakẽ nãfãfe afara chakafakanax omiskõipakenakafo.

*Pablo omiskõini Niospa meka yoikatsaxakĩ*

<sup>16</sup> Ë mato yoia keskara anã ã mato yoinõ: “Pablo afaa tãpiama,” ixõ eõnoa shinãyamakãfe. Akka ea nikapaikĩ ea nikayokãfe. Nã yora fetsa afaa tãpiama mã nikamis keskafakĩ eari nikasharayokãfe. Ëari ã pishta yoimeyonõ. <sup>17</sup> Nã ã mato yoiã keskara a ãa ã yoimesharai ãfe Ifãfe ea anori yoiama. Akka nã afaa tãpiamafãfe anori yoimisfo. <sup>18</sup> Akka nã nõko Ifo chanĩmara faafoma ãa yoimesharaifo keskara nãnori fetsafãfe mato yoimisfo. Akka iskaratĩari ã mato yoi a ãari ã yoimesharai keskara. <sup>19</sup> Akka mã shinã mã tãpikõia. Nãskaxõ nã afaa tãpiamafo mã ato nikamis. Akka afeskakĩ mato anorima yoifiaifono mã ato xatemamisma. <sup>20</sup> Mato yoimisfo ãto yonomati keskarakõi mato fakaxõ, askatari mato kaxpa yonomamisfo. Nãskatari mato pãramisfo, askatari mato chakafamisfo, askatari mato ãchamisfo. Mato askafaifono mã tenekõimis. <sup>21</sup> Mato askafakakĩ shinãkaniraka nõ mitsisipakõira ikaxõ. Ooa. Nõkai mitsisipama oa ato akaifo keskafakĩ nõri mato askafapanã. Akka nõkai mato askafamisma nõkairoko ato keskaraxõ.

Akka nãfo ãa yoimesharakakĩ mato afara yoimisfo keskafakĩ ãari ã yoimesharatiro. Ooa. Nã afaa tãpiamafo keskaraxõ anã ã mato yoi. <sup>22</sup> Akka



nāfo, “Nō hebreos yorafo,” ikani. Akka ěri hebreo yora. Askatari, “Nō israeli yorafo,” ikani. Akka ěri israeli yora. Askatari, “Nō Abraham āfe fena,” ikani. Akka ěri Abraham āfe fena. <sup>23</sup> Akka, ĵnāfo fistimē Jesucristo yonoxomisfo? Maa. Akka ěroko yonoxokĩ finakõimis. Ooa. Ĕ iskafakĩ ě mato yoi oa shināsharayamaito yoiyai keskaraxō ě mekai askayamapaifi. Akka nā chanĩmisfāfe mato yoikĩ iskafakani: “Nō Jesús yonoxokõimis. Askatari Jesúsxō noko karaxa mēra ikimanafo,” imisfo. Akka ěroko yonokĩ finakõimis. Nāskakē earoko karaxa mēra ikimakĩ finakõimisfo. Askatari ea koshakĩ finakõimisfo. Ea askafakĩ fetsaifono mē nakerakõimis. <sup>24</sup> Efe yora judeofāfe ea koshakakĩ cinco veces fakĩ ea koshamisfo. Nā ea koshaifo tii treinta y nueve ea famisfo. <sup>25</sup> Romano xanĩfofōfāferi āto chāti ea koshanifo tres veces fakĩ. Askatari ěfe kaifāferi tokirifāfe ea tsakakĩ fisti fanifo. Askatari kanõanāfānē ě pokefainaino kanõanāfā fakafā fospia ikiaino mē āsakerani. Mā kanõanāfā fakafā mēra ikiano nā kanõanāfā āfe kaxke ě fakafā mǎnǎo ě nononi āsaxikima. Fakish fisti ita pena fistiri ě ini. <sup>26</sup> Mē kafāsamis, faka faiyaito mesekõi ě õimis; askatari yometsoafāfe ea achikaxō ea mesenifaifono mē õimis; askatari ěfe kaifokõifāfe ea mesenifaifono mē õimis; yora fetsafāferi ea mesenifaifono mē õimis; pexefā rasi anoxori ea mesenifaifono mē õimis; tsōa istomaxori ea mesenifaifono mē õimis; fakafā anoari mesekõi mē õimis; “Nōri Nios Ifo sharakõifamis,” ikax a chanĩmisfāfe ea mesenifaifonori mē õimis. <sup>27</sup> Ĕ omiskõiyānā ě yonomis xokenākõiyānā; askatari ě oxa tenekõimis; askatari ě fonāiyānā nomi tenekõimis; askatari ě pimisma;

askatari matsi mei ě omiskõikõimis rapatimais ikax.

<sup>28</sup> Nãskarafo ě mei ě omiskõikõimis. Askatari afara fetsafoõnoaxri ě omiskõimis. Askatari mēxotaima ě mato shinākõimis nã mã ichanãxõ keyokõichi mã nõko Ifo Jesús Ifofamis tii mã kachikiri fayamanõ. <sup>29</sup> Akka ě nika fětsa Jesús Ifofasharapai fi rateaino ě aõxõ shinãchakakõitiro. Akka fětsa a Nios Ifofaa afara chakafamakē ě akiki õitifishkikī rãfikõitiro. <sup>30</sup> Akka nã ě mato rama yoi ai keskara kakapaikī ě mato yoima. Ē mato yoi mã tãpinõ ěa ě afaa atiro ma. <sup>31</sup> Nã Nios fisti nõko Ifo Jesucristo ãfe Apa, nãato tãpikõia ěkai chanĩmismo. Iskafakī nõ yoinõ: “Epa Niospa, mĩ sharafinakõia,” ixõ nõ yoipakexanõ. <sup>32</sup> Akka Aritas xanĩfokõi iyopaoni. Nã Aritas fetsa nĩchini Damasco anoax xanĩfo inõ. Damasco ano ě ikano, nãato ãfe sorarofõ yoini nã pe xe rasi anoxõ ãfe kãiti anoxõ ea kexenõfo ea achixikakī. <sup>33</sup> Akka anoxõ ea achipaiyaifono, nã nõko Ifo Jesús Ifofaafãfe fěta efapa mēra ea onekaxõ pe xe rasi kene fomãkĩaxõ ea fotomanifo ě katanõ.

## 12

*Pablo ãfe namapa õiai keskara õini Niospa tãpimanaino*

<sup>1</sup> Akka ěa ě yoimesharai. A ěa ě yoimesharai keskarakai akai afaama. Nãskafekē nõko Ifo Jesús ea õimana keskara ě mato yoinõ. Nã ěfe namapa ě õiai keskara ea õimana. Nã tsõa nikamismo ea tãpimani. Nãnorĩ ě mato yoi. <sup>2</sup> Mã catorce xinia finõa a Niospa ea ifirisafayoni, ě Cristo fe rafeaito õikī. Ēkai tãpiama ěfe fero mēsho fisti nai mēra kani rakikĩa, askayamai ěfe yora kani rakikĩa. Nios

fistichi tãpia a ã ini keskara. <sup>3-4</sup> Niospa nã ika ano ea ifirisafayoni. Nã ã mato yoiyoa keskara anã ã mato yoi. Ëfe yora iyamai ãfe fero mësho fisti kani rakikã ãkai tãpiama. Nios fistichi tãpia nã ã ini keskara. Nã ika anoxõ ea afara nika-manì keskara ã tsoa yoitiro. Akka ea yoikã iskafani: “A mĩ nika keskara tsoa yoiyamafe,” ixõ ea Niospa yoini. <sup>5</sup> Ë nã õia keskara ã fetsafo yoipaima iskafakã: “Niospa ea fisti nã ika ari ea õimani,” ixõ ã yoitiro. Ë anori yoipaima. Anori ã yoi kakapaimis ã itiro. Ëkai ãa ã yoimeshara-paima. Ereskai ã afaa fatiroma. Nãskakã nã fisti ã yoimis inimakã. <sup>6</sup> Akka ãa ã yoimesharai ã yoimetiro. Ë anori yoi nã yora afaa tãpiamafãfe yoimisfo keskara ã yoima. Chanĩmakõì eõnoa ã yoimesharatiro. Akka ãakai eõnoa ã yoimeshara-paima eõnoa shinãkã finakõinõfoma. Mã ea õimis ã afe keskaramãkã, askatari mã ea nikamis ã afe keskara yoimismãkã.

<sup>7</sup> Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ãa ã yoimesharapaitiro ã tãpikõiara ikax. Nãskakã Niospa nãtefayamano Satanás ea isinĩ imani nã nõ moxaki chachiano noko mõxa fekaxtefai keskafakã ãa ã yoimesharayamanõ. <sup>8</sup> Nãskakã ã kifikã iskafani: “Ifo, ea sharafafe,” ixõ tres ves fakã ã yõkani. <sup>9</sup> Ë askafaito nõko Ifãfe ea kemakã iskafani: “Ë mia noi. Askafixõ ã mia sharafaima. Cristo mia axotiro na pae mĩ tenenõ ã mefe rafekakaini. Mĩ mitsisipayamafikã ã mĩõxõ ã ato õimatiro ã afama mĩshti fatiro,” ixõ ea kemani. Nãskakã ã isinĩ ifiai ã inimasharakakaini. <sup>10</sup> Nãskakã ã

mitsisipayamafiāx Jesucristoōnoax ē inimakōi. Nāskaxō ea ĩchaifono ē tenemis, afaayayamaxri ē inimakōimis ea omiskōimanaifonori ē tenemis. Nāskatari afarafo fekaxkōifekē ē tenemis. Ē askafakī ē mitsisipayamafixō Jesucristoōxō ē afama mīshti fatiro.

*Pablo nā Nios chanīmara faafo Corinto anoafo ato shinākōini*

<sup>11</sup> Akka nā yora afaa tāpīamafo āa yoimetirofo keskarax ēa ē yoimea. Akka mā eōnoa afaa yoisharama. Akka mā ea ōisharakī, “Nā Pablo sharakōi,” ixō mā eōnoa yoiano nā sharakōi ik-erana. Nāskakē ēa ē yoimesharakōi fetsafāfe ea tāpinōfo ē afe keskaramāki. Akka ēakai ē afaa asharatiroma. Ēkai afaama. Nāskafekē nā eōnoa afara chaka mato yoimīsfāfe ea finōkanima.

<sup>12</sup> Jesucristo ea nīchini aōxō āfe meka ē mato yoinō. Nāskakē tanaimakōi ē yonomis fena fenakima. Nāskara ē yonofaino Niospa afama mīshti amis eōxō mā tāpinō Jesucristo ea nīchinikē. <sup>13</sup> Akka, ĵafeskakī mā iskafakī shināimē? “Pablo nā Nios chanīmara faa fetsafo ato shara fai keskafakī nokori shara faima,” ixō mā eōnoa yoitiroma. Akka nā Nios chanīmara faa fetsafori ē ato shara fai keskafakī, nāskarīfakī ē mato sharafa fafāfāini. Ēkai mato afaa fīapaimisma. Askatari ē mato fekaxtefamisma. Ea pimakape ea rapati safemayanā ē mato famisma. Ōitsai, ē mato afaa fīapaikima ē mato chakafaamakī ea raefakāfe.

<sup>14</sup> Mē mato ari kai rafea. Akka iskaratīa mē itipinīsharax anā ē mato ari kai. Ē mato amis keskafakī anā ē mato yōkakī fekaxtefaima. Ē mato afaa fīapaitama ēroko mato shināfāfāini.

Shinākapo. Fakefāfekai apa yafi afa pimatiro. Akka afa fetaroko apa fakefo pimatiro. Akka māfi ēfe fakekōifo keskarakī. Akka ē mato Niospa meka tāpimasharakōia eōnoax mā isharanō.

<sup>15</sup> Akka ē afarafo fikī mē kori potakī keyokōia, askafafaxō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai ōitsai mā ea noikī finasharakōimisma rakikīa.

<sup>16</sup> Akka ē mato afaa yōkamisma. Akka fetsafāfe mā Corinto anoafāfe eōnoa yoimisfo iskafakakī: “Akka mā nō tāpia Pablo mato afaa yōkamisma. Askafixō mato pāraxō mato kori fīamis, Judea anofo ē ato foxotanōra,” ixō. <sup>17</sup> ¿Nā feronāfakefo ē matoki nīchinioxō ē mato pāramē ē mato kori fīaxiki? Maa. <sup>18</sup> Ē Tito yoini iskafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ¿Titopa mato pāramē mato afara fīaxiki? Maa. Mē tāpia Titopakai mato afaa fīapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

<sup>19</sup> Mā shināiraka ē mato yoiai keskara mā eōnoa shināsharanō. Maa. Anorikaima. Epa Niospa nā ē yoiai keskara ea nikamis Cristo ea shināmanaino. Efe yora mīshtichi, nā ē mato yoiai keskafakī ē mato shara fapai Jesús shināi keskafakī māri mā shināsharanō. <sup>20</sup> Akka ē tāpiama, ōitsai, ē ari nokoxō ōia a ē yoiai keskai mā isharayamakē ē mato fichikai. Askatari ē matoki nokoaino ōitsai, mā ekeki inimaima rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā

chaka xateyamano ě shināmitsatiro. Mā fochishpanā faatanāta, fĕtsa fiaiti mārifi mā fipaita, fetsa mekafata, ōitifishkita, mares fisti mā fipaita, mā chanĭta, fetsafo mekafata, nō tsoa keskarama ita, isharayamata, mā askaito ě mato ōipaima. <sup>21</sup>Nāskatari ě shināchakakōi, shināyanā ōitsai Niospa atoōxō ea rāfimaniraka ixō ě shināi mā isharayamaino. Mā askaino ě matoki nokoax ě rāfikōixii mā afara chakafaino. Akka ranāri mā ishara-paonima. Māto āfima fe mā oxapaoni. Askatari kērofori āto fenema fe oxapaonifo. Nāskatari afara chakafo fetsa fetsatapafō mā apaoni. Akka mā xateyamaino ě nokoax ě mato ōi ě shināmitsakōixii, rāfikōiyanā.

## 13

*Pablo iskafakĭ ato yoini: “Anā afaa chakafayamakāfe,” ixō ato yoini*

<sup>1</sup> Mē mato ōikĭ rafe faa. Iskaratĭari anā ě mato ōikaikai. Ē anā mato ōikaikai mā māto chaka mā xateamākĭ. Akka kirika ano Epa Niospa meka kenenifo iskafakĭ: “Fĕtsa afara chakafaito ōixō yōfaito, ‘Nato afara chakafaa,’ ixō rafeta yoiaino, askayamakĭ trespa yoiaino askayamakĭ ranāfai yoiaino chanĭmara nō fatiro,” ixō kirika ano Niospa meka kenenifo. Nāskafakĭri ě mato ano nokoxō ě nikai mā afara chakafaito mā afara chaka xateyamaito. Akka ě mato ōitiro mā chaka ikamāki, askayamai shara mā ikamāki. <sup>2</sup> Akka anā ě mato ano kayoxō mē mato yoiyoni mā afara chakafanōma. “Mā afara chakafakĭ xateyamaino ě mato omiskōimaxii,” ixō ě mato yoiyoni. Anā iskaratĭari chai ixō ě mato yoi kirika

kenexõ iskafakĩ: “Ë anã kaxõ ã mato õikai mã mã chaka xateamãki. Akka mã chaka xateya-maito ã mato omiskõimaxii. Akka tsoa pish-takai ã finõmaxima.” <sup>3</sup> Akka mã tâpipai Cristo eõxõ mato yoiaino. Chanĩma, mã samama tâpinõ xafakĩakõi ã mato õimani. Akka êakai ã mato yoima, Cristoõxõ ã mato yoi. Jesucristo mitsisipakõikai mato tâpimani mãto chaka mã xatenõ. <sup>4</sup> Chanĩma, Jesucristo nokoõxõ ifi cruz ikakĩ mastafono nã feronãfake pachikõi keskara ini. Nokoõnoax nai ãakai ifimenima. Nãskafinixakĩ iskaratĩa Niospa sharaõnoax nia. Nãskarifiai nõri mitsisipama. Nãskafixõ Jesús feta nã Niospa apaiyai keskara nõ atiro Epa Niospa sharaõxõ.

<sup>5</sup> Akka mãto shinã mëraxõ shinãsharakãfe chanĩmamãki mã mã Jesús Ifofasharamãki. Mãa tâpimesharakãfe. Akka, ¿mã mã tâpiamẽ Jesucristo mato fe ikano? Askayamai mã mã chanĩmis rakikĩa nõ Jesús Ifofaira ifiaxõ mã Ifofaama. <sup>6</sup> Akka mã mã ea õikĩ tâpia ã Jesucristoõxõ yonosharakõimiskẽ mato mëraxõ. Nã mã chanĩmara fakõipainõ. <sup>7</sup> Ë mato Epa Nios kĩfixomis mã afaa chakafanõma. Nokoõnoa shinãnõfo ixokai ã Epa Nios kĩfimisma. Iskafakĩ fetsafãfe nokoõnoa shinãkani rakikĩa: “Pablo fe rafeafãfe ato yonoxosharafoma,” ixõ nokoõnoa yoikani rakikĩa. Akka noko askafafiaifono mã Jesús Ifosharakõifai nãskara nõ fichipai. <sup>8</sup> Akka Niospa meka shara fistiõnoa nõ yoitiro. Aõnoakai meka chaka nõ yoitiro ma ãfe mekamãi sharakõikẽ. <sup>9</sup> Akka fetsafãfe nõ afama noko askafakĩ shinãfiaifono nõ shinãchakaima. Akka mã Jesúsnoax isharakõikẽ nõ fãsi inimakõitiro. Akka nõ mato Epa Nios kĩfixona

mã a keskara sharakõi inõ. <sup>10</sup> Akka ã mato kirika kenexona mato ari kayoxoma mã ea nikanõ. Mẽ mato ari nokoxõ õia mã Cristo Ifo sharakõifaino ã mato õitoshinõ. Nãskakẽ mã isharakõiaino Niosxõ fãsi mekakai ã mato yoima mã isharakõinõ. Epa Niospa ea yoia ã mato yoisharanõ mã Nios Ifo sharakõifanõ isharakõixõ.

*Mã Pablo ãfe meka xatekĩ ato yoisharani*

<sup>11</sup> Mẽ mekai xatekĩ ã mato yoisharai. Jesús keskara isharakãfe. Ea nikasharakãfe. Nãnori fisti shinãkãfe. Isharakãfe. Mã askaino Niospa mato noikõikĩ mato inimamasharai ãfe Yõshi Sharaõxõ mato fe ixõ. <sup>12</sup> Keyokõi nã mã Nios Ifofaa tii yoinõnãsharakãfe. <sup>13</sup> Keyokõi nõko Ifo Jesús chanĩmara faafãfe nã efe ikafãfe mato yoisharapaikani.

<sup>14</sup> Nõko Ifo Jesucristo mato axosharapai. Epa Niospari mato noikõi. Niospa Yõshi Shara mato fe rafepakexanõ. Nã tii.

*Ëkĩa Pablo*



**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 13 Jul 2024 from source files  
dated 29 Jan 2022

6c7b7ce2-9d87-5405-91e6-71ce1387adcc